



UPA 2019/pkt. 137

4. april 2019

Aqqa Samuelson

**Illerfinnik angerlaassilluni assartuinnermut ikiorserneqarsinnaanermut piumasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allanngortinneqarnissaannik siunnersuummik Naalakkersuisut kingusinnerpaamik UPA2020-mut saqqummiussaqaarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluk Heilmann, Atassut)

Siunnersuuteqartumut siunnersuummullu saqqummiunneqartumut Inuit Ataqatigiit qujapput.

Illerfinnik angallassilluni assartuinnermut ikiorserneqartarnissaq inatsisitigut pisinnaatitaaffioreerpoq piumasaqaataareeraluarlunilu.

Taamaattorli pisortanit ikiorsiissutit eqqarsaatigalugit erseqqissaasoqarnissaa malittarisassallu atuuttut allanngortinneqarsinnaanerat ersarissaasoqartuuppallu isumaqataaffigisinnaallugu oqaatigisinnaavarput, innuttaasunullu paasiuminarsakkamik saqqummiussisoqartariaqarluni.

Inuiaqatigiinni avinngarusimasumi isorartuumilu najugaqariaaseqarnerput eqqarsaatigalugu toqusortavut, ilaquataat qanigisaasullu eqqarsaatigalugit illerfinnik angerlaassisinnaanerat inatsisitigut illersugaasumik aaqqissuussilluartariaqarpugut.

Ilaqutariit nukissaqarluartut akissaatitigullu inissisimalluartut illerfiit angerlaanneqarnerat namminneerlutik isumagisinnaasarpaat. Siunissami qaqugumulluunniit ilaqutariit kiffaanngissuseqarlutik illerfinnik nammineq akilerlugu angerlaassisinnaatitaanissaat pisinnaatitaaffiusariaqarpoq, ilaqutariillu nammineq pilersaarusionermikkut illerfinnik angerlaassisinnaanissamut aningaasanik katersilluni ileqqaagaqarsinnaaneq pikkorinneruffigisariaqarluni.

Taamaattorli inoqateqarpugut toqusoqarsimatillugu illerfinnik angerlaassilluni assartuinnermut akissaatitigut naammattumik pigisaqanngitsunik. Inuit isumassortariaqavissortunut akissaatitigullu akunnattumik inissisimasunut isertitakinnerusunullu iliuseqarnissarput, inatsisitigullu nalimmaasaanissarput ersarissanissarpullu allaqquuttussaangitsoq isumaqarpugut.

Ilaqutariit akissaatitigut isertitakitsut eqqarsaatigalugit illerfinnik angerlaassinissamut pisinnaatitaaffeqarnerat inatsisitigut illersorneqarnerat erseqqissarneqartariaqartoq isumaqarpugut. Ilaqutariit isertitaat aallaavigalugit illerfinnik angerlaassinermi pisortat ikiorsiissutaat annertussusilerneqartassappata inissaminiippoq. Akissaatitigut inissisimalluartut

# INUIT ATAQATIGIIT

## Inatsisartuni



nammineersinnaassuseqarnerat ataqqineqassaaq, taamaattorli akissaatitigut akunnattumik inissisimasut isertitakinnerusullu ilaannakortumik tamakkiisumilluunniit ikiorserneqarsinnaanissaminnut pisinnaatitaaffeqartariaqarput.

Taamatut oqaaseqarluta siunnersuutip aappassaaneeraneqannginnerani Ataatsimiititaliamut susasaqartumut ingerlateqqinneqarnissaa innersuupparput.